



2019 оны 03 дугаар сарын 13
№10/1063/

ТӨРИЙН МЭДЭЭЛЭЛ

МОНГОЛ УЛСЫН ИХ ХУРЛЫН АЛБАН МЭДЭЭЛЭЛ

**Монгол Улсын
Ерөнхийлөгчийн
зарлиг**

**Монгол Улсын
Засгийн газрын
тогтоол**

**Монгол Улсын
Засгийн газрын
тогтоол**

**Монгол баатарлаг туульсаа
дээдлэн дэлгэрүүлэх тухай**

Журам батлах тухай

**Журам шинэчлэн
батлах тухай**

ГАРЧИГ

МОНГОЛ УЛСЫН ЕРӨНХИЙЛӨГЧИЙН ЗАРЛИГ

72.	Монгол баатарлаг туульсаа дээдлэн дэлгэрүүлэх тухай	Дугаар 13	373
73.	Шүүхийн ерөнхий зөвлөлийн гишүүнээр томилох тухай	Дугаар 22	374
74.	Зарлиг хүчингүй болгох тухай	Дугаар 24	374

МОНГОЛ УЛСЫН ЗАСГИЙН ГАЗРЫН ТОГТООЛ

75.	Журам батлах тухай	Дугаар 341	375
76.	Журам батлах тухай	Дугаар 348	381
77.	Журам батлах тухай	Дугаар 353	386
78.	Журам шинэчлэн батлах тухай	Дугаар 354	389

МОНГОЛ УЛСЫН ЕРӨНХИЙЛӨГЧИЙН ЗАРЛИГ

2019 оны 01 дүгээр сарын 29-ний өдөр

Дугаар 13

Улаанбаатар хот

Монгол баатарлаг туульсаа дээдлэн дэлгэрүүлэх тухай

Монгол түмний бахархалт өв соёл, үеэс үед уламжлагдан ирсэн аман билгийн эх ундарга болсон баатарлаг туульсаа дээдлэн, дэлгэрүүлэх зорилгоор Монгол Улсын Үндсэн хуулийн Долоодугаар зүйлийн 1, Гучин дөрөвдүгээр зүйлийн 1, Монгол Улсын Ерөнхийлөгчийн тухай хуулийн 9 дүгээр зүйлийн 1 дэх хэсгийг тус тус үндэслэн ЗАРЛИГ БОЛГОХ нь:

1. “Аваргасын таван бодон”, “Алтан ундарга”, “Бужин даваа хаан”, “Довон хар бөх”, “Жангар”, “Зул алдар хаан”, “Мөнх сайхан төрт Алтан торц”, “Хан харангуй”, “Хилэн галзуу баатар” зэрэг баатарлаг туульсыг олон нийтэд дэлгэрүүлэн таниулж, дээжээс үндэсний бичигт буулган нэг хувийг бүтээж, Төрийн ордонд дээдлэн залсугай.

2. Жил бүрийн Цагаан сарын баярыг тохиолдуулан хаврын тэргүүн сарын шинийн гуравны өдөр, Монгол бахархлын өдрийг тохиолдуулан өвлийн тэргүүн сарын шинийн гуравны өдөр Төрийн ёслол хүндэтгэлийн өргөөнд баатарлаг туульсыг хайлж байхаар тогтоосугай.



3. Баатарлаг туульсаа дээдлэн хамгаалах, бүртгэн судлах, өвлөн уламжлуулах, түгээн дэлгэрүүлэх, олон улсад сурталчлан таниулах; туульч, өвлөн уламжлагч, өв тээгчид болон судлаачдыг урамшуулах үйл ажиллагааг дэмжиж ажиллахыг төрийн бүх шатны байгууллага, албан тушаалтанд үүрэг болгосугай.

4. Монгол баатарлаг туульсынхаа агуулга, ач холбогдлыг таньж ойлгох, дэмжин дэлгэрүүлэх, өв соёлоо хүндэтгэн дээдлэх, хадгалах, уламжлуулан хамгаалах үйлсэд идэвх санаачилгатай оролцохыг төрийн ба төрийн бус байгууллага, иргэд олон нийт, эрдэмтэн судлаачид, шинжлэх ухааны ба хэвлэл мэдээллийн байгууллагуудад уриалсугай.

**МОНГОЛ УЛСЫН
ЕРӨНХИЙЛӨГЧ**

**ХАЛТМААГИЙН
БАТТУЛГА**

МОНГОЛ УЛСЫН ЕРӨНХИЙЛӨГЧИЙН ЗАРЛИГ

2019 оны 02 дугаар
сарын 12-ны өдөр

Дугаар 22

Улаанбаатар
хот

Шүүхийн ерөнхий зөвлөлийн гишүүнээр томилох тухай

Монгол Улсын Ерөнхийлөгчийн тухай хуулийн 9 дүгээр зүйлийн 1, 12 дугаар зүйлийн 18, Шүүхийн захиргааны тухай хуулийн 13 дугаар зүйлийн 13.1 дэх хэсгийг тус тус үндэслэн ЗАРЛИГ БОЛГОХ нь:

Энхээгийн Батбаярыг Шүүхийн ерөнхий зөвлөлийн гишүүнээр томилсугай

**МОНГОЛ УЛСЫН
ЕРӨНХИЙЛӨГЧ**

**ХАЛТМААГИЙН
БАТТУЛГА**

МОНГОЛ УЛСЫН ЕРӨНХИЙЛӨГЧИЙН ЗАРЛИГ

2019 оны 02 дугаар
сарын 22-ны өдөр

Дугаар 24

Улаанбаатар
хот

Зарлиг хүчингүй болгох тухай

Монгол Улсын Ерөнхийлөгчийн тухай хуулийн 9 дүгээр зүйлийн 1 дэх хэсгийг үндэслэн ЗАРЛИГ БОЛГОХ нь:

1. Монгол Улсын Ерөнхийлөгчийн 2006 оны 05 дугаар сарын 29-ний өдрийн 124 дүгээр зарлигийг хүчингүй болгосугай.

2. Энэ зарлиг гарсантай холбогдуулан Зэвсэгт хүчний ерөнхий командлагчийн хиурыг Төрийн түүхийн музейд шилжүүлэн хадгалуулсугай.

**МОНГОЛ УЛСЫН
ЕРӨНХИЙЛӨГЧ**

**ХАЛТМААГИЙН
БАТТУЛГА**

МОНГОЛ УЛСЫН ЗАСГИЙН ГАЗРЫН ТОГТООЛ

2018 оны 11 дүгээр
сарын 14-ний өдөр

Дугаар 341

Улаанбаатар
хот

Журам батлах тухай

Хот, суурин газрыг дахин хөгжүүлэх тухай хуулийн 7.1.3-т заасныг үндэслэн Монгол Улсын Засгийн газраас ТОГТООХ нь:

1. "Гэр хорооллын газрыг дахин зохион байгуулах зорилгоор өмчлөгч, эзэмшигч газраар хувь нийлүүлэх журам"-ыг хавсралт ёсоор баталсугай.

2. Энэ тогтоолын хэрэгжилтийг харьяалах нутаг дэвсгэртээ зохион байгуулж ажиллахыг аймаг, нийслэлийн Засаг дарга нарт, хэрэгжилтэд хяналт тавьж ажиллахыг Барилга, хот байгуулалтын сайд Х.Баделханд даалгасугай.

**МОНГОЛ УЛСЫН
ЕРӨНХИЙ САЙД**

У.ХҮРЭЛСҮХ

**БАРИЛГА, ХОТ
БАЙГУУЛАЛТЫН САЙД**

Х.БАДЕЛХАН

Засгийн газрын 2018 оны 341 дүгээр
тогтоолын хавсралт

**ГЭР ХОРООЛЛЫН ГАЗРЫГ ДАХИН ЗОХИОН БАЙГУУЛАХ ЗОРИЛГООР
ӨМЧЛӨГЧ, ЭЗЭМШИГЧ ГАЗРААР ХУВЬ НИЙЛҮҮЛЭХ ЖУРАМ**

Нэг. Нийтлэг үндэслэл

1.1. Хот, суурин газрыг дахин хөгжүүлэх тухай хуулийн 17.1-д заасан гэр хорооллын газрыг дахин зохион байгуулах үйл ажиллагаа (цаашид "төсөл" гэх)-г хэрэгжүүлэх зорилгоор газар өмчлөгч, эзэмшигч иргэн, хуулийн этгээд сайн дурын үндсэн дээр газраар хувь нийлүүлэх болон хувь нийлүүлсэн талбайн хэмжээг тооцохтой холбогдон үүсэх харилцааг энэ журмаар зохицуулна.



1.2. Газраар хувь нийлүүлэхэд энэ журмын 3.3-т заасан аргаас сонгон хэрэглэх бөгөөд 3.5-д заасан жишиг аргачлалын дагуу хувь нийлүүлсэн талбайн хэмжээг тооцно.

1.3. Энэ журмыг төсөлд оролцогч газар өмчлөгч, эзэмшигч иргэн, хуулийн этгээд өмчийн төрөл, хэлбэр үл харгалзан дагаж мөрдөнө.

1.4. Төсөл хэрэгжүүлэхээр сонгосон талбай (цаашид “сонгосон талбай” гэх) дахь Хот, суурин газрыг дахин хөгжүүлэх тухай хуулийн 17.4-т заасан зориулалтаар ашиглах талбайг газар өмчлөгч, эзэмшигч иргэн, хуулийн этгээд сайн дурын үндсэн дээр өөрийн өмчлөл, эзэмшлийн газраас хувь нийлүүлэн бий болгоно.

1.5. Газраар хувь нийлүүлэхэд Хот, суурин газрыг дахин хөгжүүлэх тухай хуулийн 5.1-д заасан зарчмыг баримтлах бөгөөд газар өмчлөгч, эзэмшигч иргэн, хуулийн этгээдийн сайн дурын оролцоог хангана.

Хоёр. Газраар хувь нийлүүлэх үйл ажиллагаа

2.1. Газраар хувь нийлүүлэх үйл ажиллагааг Хот, суурин газрыг дахин хөгжүүлэх тухай хуулийн 14.7-д заасан төсөл хэрэгжүүлэх үе шаттай уялдуулан зохион байгуулна.

2.2. Төсөл хэрэгжүүлэхийг сонирхогч хуулийн этгээд газраар хувь нийлүүлэх үйл ажиллагаанд дараахь байдлаар оролцоно:

2.2.1. сонгосон талбай дахь өмчлөл, эзэмшлийн газар, үл хөдлөх эд хөрөнгийн судалгаа, мэдээллийг цуглуулан, газар ашиглалт, газар зохион байгуулалт, барилгажилт, инженерийн бэлтгэл арга хэмжээ, инженерийн болон нийгмийн дэд бүтцийн хангамжийг тооцож, дүн шинжилгээ хийнэ;

2.2.2. энэ журмын 2.2.1-д заасан судалгаа, мэдээлэл, дүн шинжилгээнд үндэслэн газраар хувь нийлүүлэх талбайн хэмжээг тооцох арга, газар өмчлөгч, эзэмшигч иргэн, хуулийн этгээдийн нийлүүлэх газрын хувь, хэмжээ болон газраар хувь нийлүүлэх талбайн нийт хэмжээ, нөөц талбайн хэмжээ, өөрчлөн зохион байгуулагдах нэгж талбарын хэмжээ, газар ашиглалтын болон төслийн үйл ажиллагааны төлөвлөгөөг тус тус тусгасан төслийн эхний хувилбарыг боловсруулна;

2.2.3. сонгосон талбай дахь газар өмчлөгч, эзэмшигч иргэн, хуулийн этгээдэд төслийн эхний хувилбарыг танилцуулна;

2.2.4. сонгосон талбай дахь газраар хувь нийлүүлэх талбайн нийт хэмжээ, түүнийг тооцох арга болон газар өмчлөгч, эзэмшигч иргэн,

хуулийн этгээдийн нийлүүлэх газрын хувь, хэмжээг харилцан тохиролцож тэдгээрийн 80-аас доошгүй хувийн зөвшөөрлийг авна;

2.2.5. Хот, суурин газрыг дахин хөгжүүлэх тухай хуулийн 14.7.2.а-д заасан төлөвлөгөөнд газраар хувь нийлүүлэх талбайн нийт хэмжээ, нөөц талбайн хэмжээ, газар өмчлөгч, эзэмшигчийн нэгж талбар тус бүрийн өөрчлөн зохион байгуулалтыг тусган боловсруулна.

2.3. Тухайн шатны Засаг дарга газраар хувь нийлүүлэх үйл ажиллагаанд дараахь байдлаар оролцоно:

2.3.1. Хот, суурин газрыг дахин хөгжүүлэх тухай хуулийн 14.7.2.б-д заасан төлөвлөгөөг хянаж, төсөл хэрэгжүүлэх шийдвэр гаргана;

2.3.2. төсөл хэрэгжүүлэгч, газар өмчлөгч, эзэмшигч иргэн, хуулийн этгээдтэй Хот, суурин газрыг дахин хөгжүүлэх тухай хуулийн 24.1-д заасан гурван талт гэрээ (цаашид “гэрээ” гэх)-г байгуулна. Гэрээнд газар чөлөөлөх хугацааг тодорхой тусгасан байх бөгөөд энэ журмын 2.3.1-д заасан төлөвлөгөө нь гэрээний хавсралт болно;

2.3.3. төсөл хэрэгжүүлэх шийдвэр гаргаснаас хойш 30 хоногийн дотор гэрээ байгуулах бөгөөд шаардлагатай тохиолдолд аймаг, нийслэл, сум, дүүргийн Засаг дарга уг хугацааг 30 хүртэл хоногоор сунгаж болно;

2.3.4. сонгосон талбайд газар өмчлөх, эзэмших эрх олгохыг зогсоох болон шилжилт хөдөлгөөнийг хязгаарлах талаар хуульд заасан зохих арга хэмжээ авна;

2.3.5. сонгосон талбайд Хот байгуулалтын тухай хуулийн 24.2-т заасны дагуу хот байгуулалтын бусад үйл ажиллагаа явуулахыг түр зогсоох арга хэмжээ авна;

2.3.6. газар эзэмшигчийн газраар хувь нийлүүлэх үйл ажиллагаанд оролцох эрхийг хангах арга хэмжээ авах, эсхүл энэ талаар холбогдох шатны Засаг даргад хүсэлт гаргаж шийдвэрлүүлнэ.

2.4. Газар, үл хөдлөх эд хөрөнгө өмчлөгч, эзэмшигч иргэн, хуулийн этгээд газраар хувь нийлүүлэх үйл ажиллагаанд дараахь байдлаар оролцоно:

2.4.1. газар өмчлөгч иргэн нь өөрийн өмчлөлийн газраар хувь нийлүүлж оролцоно;



2.4.2. газар эзэмшигч иргэн, хуулийн этгээд нь өөрийн эзэмшлийн газраар хувь нийлүүлж оролцоно;

2.4.3. хувь нийлүүлэн бий болох талбайн хэмжээ болон өөрийн нийлүүлэх газрын хувь, хэмжээний талаарх саналаа Хот, суурин газрыг дахин хөгжүүлэх тухай хуулийн 22.2-т заасан иргэдийн төлөөллийн байгууллагад гаргана;

2.4.4. газар, үл хөдлөх эд хөрөнгө өмчлөх, эзэмших эрхийн баримт бичгийн аливаа зөрчилгүй байх, эсхүл төсөл хэрэгжүүлэх шийдвэр гарахаас өмнө өөрийн зардлаар зөрчлийг арилгасан байна.

2.5. Төсөл хэрэгжүүлэгч нь гэрээ байгуулагдсанаас хойш энэ журмын 2.3.1-д заасан төлөвлөгөөний дагуу сонгосон талбай дахь газар өмчлөгч, эзэмшигчтэй хамтран газраар хувь нийлүүлэх үйл ажиллагааг зохион байгуулна.

2.6. Газраар хувь нийлүүлэх үйл ажиллагаанд сонгосон талбай дахь газар өмчлөгч, эзэмшигчийн нэгж талбарын хувийн хэрэг, эрхийн гэрчилгээнд заасан газрын хэмжээ, зааг, байршлыг үндэслэл болгоно.

2.7. Төсөл хэрэгжүүлэх шийдвэр гарснаас хойш хувь нийлүүлсэн газрын төлбөр төлөх үүрэг төсөл хэрэгжүүлэгч хуулийн этгээдэд шилжинэ.

2.8. Хот, суурин газрыг дахин хөгжүүлэх тухай хуулийн 22.5-д заасан иргэдийн төлөөллийн байгууллага газраар хувь нийлүүлэх үйл ажиллагаанд хяналт тавина.

2.9. Төслийн оролцогч талууд төслийн аль ч үе шатанд сонгосон талбай дахь төслийг дэмжээгүй газар, өмчлөгч, эзэмшигч иргэн, хуулийн этгээдийг төсөлд хамруулах, тохиролцох талаар шаардлага тавьж болно.

2.10. Хот, суурин газрыг дахин хөгжүүлэх тухай хуулийн 14.7.4.б-д заасан төсөл хэрэгжүүлж дуусах үе шатанд сонгосон талбай дахь хувь нийлүүлж бий болгосон талбайн газрын эрхийг холбогдох хууль тогтоомжийн дагуу шинээр бүртгүүлнэ.

Гурав. Газраар хувь нийлүүлэх талбайн хэмжээг тооцох

3.1. Сонгосон талбайн хэмжээг Хот, суурин газрыг дахин хөгжүүлэх тухай хуулийн 8.1.6-д заасан журмын дагуу тогтоосон байна.

3.2. Сонгосон талбайд Хот, суурин газрыг дахин хөгжүүлэх тухай хуулийн 17.4.1, 17.4.2-т тус тус заасан зориулалтаар газраар хувь

нийлүүлэх бөгөөд дээрх зориулалт тус бүрийн талбайн хэмжээг энэ журмын 2.2.1-д заасан тооцоо судалгаа, дүн шинжилгээний үндсэн дээр урьдчилан тодорхойлсон байна.

3.3. Газар өмчлөгч, эзэмшигч иргэн, хуулийн этгээдийн газраар хувь нийлүүлэх талбайн хэмжээг тооцоход дор дурдсан аргуудаас сонгон хэрэглэнэ:

3.3.1. өмчлөл, эзэмшлийн газраас адил тэнцүү хувиар нийлүүлэх (%);

3.3.2. өмчлөл, эзэмшлийн газраас адил тэнцүү хэмжээгээр нийлүүлэх (м²);

3.3.3. өмчлөл, эзэмшлийн газраас адил тэнцүү хэмжээгээр үлдээх (м²);

3.3.4. энэ зүйлийн 3.3.1, 3.3.2-т заасан аргуудыг хослуулах (% , м²);

3.3.5. тухайн газрын байршил, хэмжээ, нөхцөлийг харгалзан хувь нийлүүлэх газрын хэмжээг нэгж талбар тус бүрт ялгавартай тогтоох (м², %).

3.4. Газар өмчлөгч, эзэмшигч иргэн, хуулийн этгээд, төсөл хэрэгжүүлэгч, тухайн шатны Засаг дарга нар харилцан тохиролцож, төслийн онцлогтой уялдуулан энэ журмын 3.3-т заасан аргуудаас аль тохиромжтой хэлбэрийг сонгон хэрэглэнэ.

3.5. Газар өмчлөгч, эзэмшигч иргэн, хуулийн этгээдийн нийлүүлэх газрын хувь, талбайн хэмжээг сонгосон талбай дахь газраар хувь нийлүүлэн бий болгох талбайн нийт хэмжээнд үндэслэн тогтоох бөгөөд энэ журмын хавсралт жишиг аргачлалд заасны дагуу тооцно.

Дөрөв. Бусад

4.1. Хот, суурин газрыг дахин хөгжүүлэх тухай хуулийн 26 дугаар зүйлд заасан Хяналтын хороо (цаашид “Хороо” гэх) сонгосон талбай дахь төслийг дэмжээгүй газар өмчлөгч, эзэмшигч иргэн, хуулийн этгээдийн эрх, ашиг сонирхлыг хамгаална.

4.2. Энэ журмыг зөрчсөн этгээдэд холбогдох хууль тогтоомжид заасны дагуу хариуцлага хүлээлгэнэ.

4.3. Газраар хувь нийлүүлэн бий болгосон талбайг зориулалтын дагуу ашиглаж байгаа эсэхэд Хороо хяналт тавина.



“Гэр хорооллын газрыг дахин зохион байгуулах зорилгоор өмчлөгч, эзэмшигч газраар хувь нийлүүлэх журам”-ын хавсралт

ГАЗРААР ХУВЬ НИЙЛҮҮЛЭХ ТАЛБАЙН ХЭМЖЭЭГ ТООЦОХ ЖИШИГ АРГАЧЛАЛ

1. Сонгосон талбай дахь газар өмчлөгч, эзэмшигч иргэн, хуулийн этгээдийн газраар хувь нийлүүлэх талбайн нийт хэмжээ (E)-г дараахь томъёогоор тооцно:

$$E=A-(T-P-R);$$

$$\text{үүнээс } P=P_1+F$$

- T-сонгосон талбайн хэмжээ (m^2);
- A-газар өмчлөгч, эзэмшигч иргэн, хуулийн этгээдийн газрын нэгж талбарын нийт хэмжээ (m^2);
- P-сонгосон талбайд үүсэх нийтийн эдэлбэрийн газрын хэмжээ (m^2);
- P_1 -сонгосон талбай дахь одоо байгаа нийтийн эдэлбэрийн газрын хэмжээ (m^2);
- F-Хот, суурин газрыг дахин хөгжүүлэх тухай хуулийн 17.4.1-д заасан зориулалтаар хувь нийлүүлэх талбайн хэмжээ (m^2);
- R-Хот, суурин газрыг дахин хөгжүүлэх тухай хуулийн 17.4.2-т заасан зориулалтаар хувь нийлүүлэх талбай буюу нөөц талбайн хэмжээ (m^2).

1. Журмын 3.3-т заасан аргуудыг дор дурдсан аргачлалын дагуу хэрэглэнэ:

2.1. Өмчлөл, эзэмшлийн газраас адил тэнцүү хувиар нийлүүлэх тохиолдолд:

а) газраар хувь нийлүүлэх хувь (LCR)-ийг дараахь томъёогоор тооцно: $LCR=E/A*100\%$

- E-сонгосон талбай дахь газраар хувь нийлүүлэх талбайн нийт хэмжээ (m^2);
- A-газар өмчлөгч, эзэмшигчийн газрын нэгж талбарын нийт хэмжээ (m^2).

б) төсөл хэрэгжиж дууссаны дараа газар өмчлөгч, эзэмшигчдэд үлдэх нэгж талбарын хэмжээ (V_a)-г дараахь томъёогоор тооцно:

$$V_a=A_a-A_a(LCR/100)$$

- A_a -Төсөл хэрэгжихээс өмнөх өмчлөл, эзэмшлийн газрын нийт талбай (m^2);
- LCR-Газраар хувь нийлүүлэх хувь (%).

2.2. Өмчлөл, эзэмшлийн газраас адил тэнцүү хэмжээгээр нийлүүлэх тохиолдолд:

а) сонгосон талбай дахь өмчлөл, эзэмшлийн нэгж талбар тус бүрээс адил тэнцүү хэмжээгээр нийлүүлэх газрын хэмжээ (LCA)-г дараахь томъёогоор тооцно.

$$LCA=E/NP$$

- NP-Сонгосон талбай дахь нэгж талбарын тоо

2.3. Өмчлөл, эзэмшлийн газраас адил тэнцүү хэмжээгээр үлдээх тохиолдолд:

а) төсөл хэрэгжиж дууссаны дараа газар өмчлөгч, эзэмшигчдэд адил тэнцүү хэмжээтэй үлдээх нэгж талбарын хэмжээ (Ba)-г дараахь томъёогоор тооцно.

$$Ba=B/NP$$

- B-Төслийн дараа өөрчлөн зохион байгуулагдах өмчлөл, эзэмшлийн нэгж талбарын нийт хэмжээ (m2)

МОНГОЛ УЛСЫН ЗАСГИЙН ГАЗРЫН ТОГТООЛ

2018 оны 11 дүгээр
сарын 21-ний өдөр

Дугаар 348

Улаанбаатар
хот

Журам батлах тухай

Хөгжлийн бодлого төлөвлөлтийн тухай хуулийн 6.6-д заасныг үндэслэн Монгол Улсын Засгийн газраас ТОГТООХ нь:

1. “Улсын хөрөнгө оруулалтын хөтөлбөр боловсруулах нийтлэг журам”-ыг хавсралт ёсоор шинэчлэн баталсугай.

2. Эрхлэх асуудлын хүрээний хөрөнгө оруулалтын төслийн үр ашгийн тооцоо, судалгааг хийж, хэрэгжүүлэх дараалал, ач холбогдлоор нь эрэмбэлэн жил бүрийн 2 дугаар сарын 15-ны өдрийн дотор Үндэсний хөгжлийн асуудал эрхэлсэн төрийн захиргааны байгууллагад хүргүүлж байхыг төсвийн ерөнхийлөн захирагч нарт үүрэг болгосугай.

3. Улсын хөрөнгө оруулалтын хөтөлбөрт хамрагдах төслийн төлөвлөлтийн үндэслэлийг сайжруулах, гүйцэтгэлийг хангахад шаардагдах мэдээлэл, тайланг Үндэсний хөгжлийн асуудал эрхэлсэн



төрийн захиргааны байгууллагад гаргаж өгч байхыг яам, Засгийн газрын агентлагт даалгаж, Монголбанк (Н.Баяртсайхан), Санхүүгийн зохицуулах хороо (С.Даваасүрэн), Үндэсний статистикийн хороо (А.Ариунзаяа)-нд зөвлөсүгэй.

4. Энэ тогтоол гарсантай холбогдуулан “Нийтлэг журам батлах тухай” Засгийн газрын 2010 оны 5 дугаар сарын 19-ний өдрийн 123 дугаар тогтоолыг хүчингүй болсонд тооцсугай.

**МОНГОЛ УЛСЫН
ЕРӨНХИЙ САЙД**

У.ХҮРЭЛСҮХ

**МОНГОЛ УЛСЫН САЙД,
ЗАСГИЙН ГАЗРЫН ХЭРЭГ
ЭРХЛЭХ ГАЗРЫН ДАРГА**

Г.ЗАНДАНШАТАР

Засгийн газрын 2018 оны 348 дугаар
тогтоолын хавсралт

**УЛСЫН ХӨРӨНГӨ ОРУУЛАЛТЫН ХӨТӨЛБӨР
БОЛОВСРУУЛАХ НИЙТЛЭГ ЖУРАМ**

Нэг. Нийтлэг үндэслэл

1.1. Хөгжлийн бодлого төлөвлөлтийн тухай хууль, Төсвийн тухай хууль, холбогдох бусад хууль тогтоомжид үндэслэн Улсын хөрөнгө оруулалтын хөтөлбөрийг боловсруулах, хэрэгжилтийг хянах үйл ажиллагаатай холбогдсон харилцааг энэ журмаар зохицуулна.

1.2. Улсын хөрөнгө оруулалтын хөтөлбөрт урт, дунд хугацааны хөгжлийн бодлогын баримт бичигт тусгагдсан, улсын төсөв, гадаадын зээл, тусламж, төр-хувийн хэвшлийн түншлэл, Монгол Улсын Хөгжлийн банкны санхүүжилтээр хэрэгжих, Төсвийн тухай хуулийн 28.1-д заасан хөрөнгө оруулалтын төсөл, арга хэмжээг (цаашид “хөрөнгө оруулалтын төсөл” гэх) хамруулна.

1.3. Улсын хөрөнгө оруулалтын хөтөлбөрийг үндэсний хөгжлийн асуудал эрхэлсэн төрийн захиргааны байгууллага боловсруулж, Засгийн газар дөрвөн жилд нэг удаа баталж, жил бүр тодотгоно.

1.4. Улсын хөрөнгө оруулалтын хөтөлбөрийг боловсруулах, хэрэгжүүлэх үйл ажиллагааг сонирхогч талууд болон нийтэд ил тод мэдээлнэ.

Хоёр. Улсын хөрөнгө оруулалтын хөтөлбөрийг
боловсруулахад тавигдах шаардлага

2.1. Улсын хөрөнгө оруулалтын хөтөлбөр нь Төсвийн тухай хууль, Өрийн удирдлагын тухай хууль, Үндэсний аюулгүй байдлын үзэл баримтлал, урт, дунд хугацааны хөгжлийн бодлогын баримт бичиг болон төсвийн чадавх, эдийн засгийн шингээх чадвар, гадаад өрийн зохистой түвшинд нийцсэн байна.

2.2. Улсын хөрөнгө оруулалтын хөтөлбөрийг боловсруулахдаа хөрөнгийн эх үүсвэрийн дээрээс доош хандсан хуваарилалт болон уг хуваарьт багтаан боловсруулсан, доороос дээш чиглэсэн, салбар хоорондын уялдааг хангасан, салбартаа хамгийн хэрэгцээтэй хөрөнгө оруулалтын төслийг сонгон шалгаруулах зарчимд үндэслэнэ.

2.3. Гадаадын зээл, тусламжаар хэрэгжих хөрөнгө оруулалтын төсөлд шаардлагатай гэж үзвэл холбогдох төрийн захиргааны төв байгууллагын саналыг авна.

2.4 Төр-хувийн хэвшлийн түншлэлийн хүрээнд хэрэгжих хөрөнгө оруулалтын төслийн төрөөс хүлээх үүргийг хэрэгжүүлэхэд шаардагдах хөрөнгийг санхүүжүүлэх эх үүсвэрийг тооцно.

2.5. Улсын хөрөнгө оруулалтын хөтөлбөрт тусгах хөрөнгө оруулалтын төслийн урсгал зардлыг тооцож, төсвийн хүрээний мэдэгдэлтэй уялдуулна.

2.6. Улсын хөрөнгө оруулалтын хөтөлбөрт тусгах хөрөнгө оруулалтын төсөл нь холбогдох аргачлал, удирдамжийн дагуу боловсруулсан, баримт бичгийн иж бүрдэл, төсөлд тавигдах шаардлагыг хангасан, санхүү, эдийн засаг, нийгмийн үр ашигтай болох нь нотлогдсон байна.

2.7. Үндэсний хөгжлийн асуудал эрхэлсэн төрийн захиргааны байгууллага нь Төсвийн тухай хуулийн 28.4, 28.6-д заасныг үндэслэн, төсвийн ерөнхийлөн захирагчаас ирүүлсэн хөрөнгө оруулалтын төслийн саналын техник эдийн засгийн үндэслэлийн урьдчилсан судалгаа, техник эдийн засгийн үндэслэл, зураг төсвийг холбогдох төрийн байгууллагатай хамтран боловсруулна.

2.8. Үндэсний хөгжлийн асуудал эрхэлсэн төрийн захиргааны байгууллага нь тооцоо судалгаа шаардлага хангаагүй, иж бүрдэл дутуу, хөрөнгийн хязгаартай уялдаагүй, тогтоосон хугацаанд ирүүлээгүй, хэрэгжих боломжгүй, цаашид үр ашигтай байх нь нотлогдоогүй хөрөнгө оруулалтын төслийг төсөл санаачлагчид буцаах эрхтэй.



Гурав. Улсын хөрөнгө оруулалтын хөтөлбөрийг боловсруулах дараалал

3.1. Төсвийн тухай хууль, Өрийн удирдлагын тухай хууль, макро эдийн засгийн үзүүлэлтүүд, төсвийн хүрээний мэдэгдэл болон гадаад өрийн зохистой түвшинд үндэслэн улсын хөрөнгө оруулалтын хөтөлбөрийн улсын төсөв, гадаад зээл, тусламжаар санхүүжих төслийн нийт дүн болон улс, орон нутгийн төсвөөс эргэн төлөгдөх нөхцөлтэй концессын гэрээгээр хэрэгжих төслийн эргэн төлөлтөд шаардагдах хөрөнгийн дээд хязгаарыг санхүү, төсвийн асуудал эрхэлсэн төрийн захиргааны төв байгууллагаас тогтоож, жил бүрийн 12 дугаар сарын 1-ний дотор үндэсний хөгжлийн асуудал эрхэлсэн төрийн захиргааны байгууллагад хүргүүлнэ.

3.2. Үндэсний хөгжлийн асуудал эрхэлсэн төрийн захиргааны байгууллага нь Монгол Улсын Хөгжлийн банкны тухай хууль, Концессын тухай хууль, урт, дунд хугацааны хөгжлийн бодлогын баримт бичиг, концессын зүйлийн жагсаалт болон энэ журмын 3.1-д заасан хязгаарт үндэслэн, төсвийн ерөнхийлөн захирагчийн саналыг харгалзан улсын хөрөнгө оруулалтын хөтөлбөрт тусгах төслийн санхүүжилтийн эх үүсвэрийг сонгоно.

3.3. Төсвийн ерөнхийлөн захирагч нь хөрөнгө оруулалтын төслийн саналаа энэ журмын хоёрдугаар хэсэгт заасан шаардлагад нийцүүлэн, “Улсын хөрөнгө оруулалтын хөтөлбөрт тусгах хөрөнгө оруулалтын төслийг боловсруулах аргачлал”-ын дагуу боловсруулж, Сайдын/даргын зөвлөлөөр хэлэлцүүлэн, уг хурлын тэмдэглэл болон салбарын өмнөх оны хүлээгдэж буй гүйцэтгэлийн тайлан, дэлгэрэнгүй танилцуулгын хамт 2 дугаар сарын 15-ны дотор үндэсний хөгжлийн асуудал эрхэлсэн төрийн захиргааны байгууллагад ирүүлнэ.

3.4. Төсвийн ерөнхийлөн захирагч нь үндэсний хөгжлийн асуудал эрхэлсэн төрийн захиргааны байгууллагад хөрөнгө оруулалтын төслийн саналаа хүргүүлэхийн өмнө хөрөнгө оруулалтын төслийн мэдээллийн нэгдсэн санд оруулна.

3.5. Үндэсний хөгжлийн асуудал эрхэлсэн төрийн захиргааны байгууллага нь төсвийн ерөнхийлөн захирагчаас ирүүлсэн хөрөнгө оруулалтын төслүүдийг урт, дунд хугацааны хөгжлийн бодлогын баримт бичигтэй уялдуулан хянан нэгтгэж, холбогдох аргачлалын дагуу үнэлж эрэмбэлэн, улсын хөрөнгө оруулалтын хөтөлбөрийн төслийг боловсруулж дөрвөн жилд нэг удаа, түүний тодотголын төслийг тухайн жилийн 5 дугаар сарын 15-ны дотор Засгийн газарт хүргүүлнэ.

3.6. Тухайн санхүүгийн жилд шинээр улсын төсвөөр хэрэгжүүлэх болон концессын эргэн төлөлт хийгдэх хөрөнгө оруулалтын төслийн жагсаалтыг үндэсний хөгжлийн асуудал эрхэлсэн төрийн захиргааны

байгууллагаас санхүү, төсвийн асуудал эрхэлсэн төрийн захиргааны төв байгууллагад хүргүүлнэ.

Дөрөв. Холбогдох байгууллагуудын эрх, үүрэг

4.1. Улсын хөрөнгө оруулалтын хөтөлбөрийг боловсруулах, хэрэгжүүлэхэд үндэсний хөгжлийн асуудал эрхэлсэн төрийн захиргааны байгууллага дараахь эрх, үүрэгтэй байна:

4.1.1. Улсын хөрөнгө оруулалтын хөтөлбөрийг улсын урт, дунд хугацааны бодлоготой уялдуулан хянан нэгтгэх, хэлэлцүүлэх, хэрэгжилтэд хяналт тавих, дүгнэх, тайлагнахтай холбоотой зохион байгуулалтын арга хэмжээ авах;

4.1.2. Энэ журмын 2.7-д заасан судалгаа, зураг төсвийн ажлын даалгаврыг хянан баталгаажуулах, хэрэгжилтийг хянах;

4.1.3. “Улсын хөрөнгө оруулалтын хөтөлбөрт тусгах хөрөнгө оруулалтын төслийг боловсруулах аргачлал”, “Улсын хөрөнгө оруулалтын хөтөлбөрт тусгах төслийг үнэлэх, эрэмбэлэх, сонгох, хэрэгжилтэд хяналт тавих аргачлал” болон холбогдох бусад аргачлал, заавар, удирдамж, маягыг боловсруулан баталж, мөрдүүлэх;

4.1.4. Төрийн захиргааны төв болон нутгийн захиргааны байгууллага, Засгийн газрын агентлагийн улсын хөрөнгө оруулалтын хөтөлбөр хариуцсан ажилтныг сургах, дадлагажуулах, мэргэшил арга зүйн зөвөлгөө өгөх;

4.1.5. Хөрөнгө оруулалтын төслийн хэрэгжилтийн явц, гүйцэтгэлтэй танилцах, тухайн төсөл, арга хэмжээг хариуцсан гүйцэтгэгч, захиалагч байгууллагын мэдээлэл, сонсголыг жил бүр хэлэлцэх, төсвийн ерөнхийлөн захирагчаас холбогдох мэдээ, тайланг авах, гүйцэтгэлийн талаарх дүгнэлт, санал, зөвлөмж гарган хүргүүлэх, хөрөнгө оруулалтын төслийн мэдээллийн нэгдсэн санд бүртгэх.

4.2. Улсын хөрөнгө оруулалтын хөтөлбөрийг боловсруулж, хэрэгжүүлэхэд төсвийн ерөнхийлөн захирагч, нутгийн өөрөө удирдах ёсны болон нутгийн захиргааны байгууллага дараахь эрх, үүрэгтэй:

4.2.1. Улсын хөрөнгө оруулалтын хөтөлбөрт тусган хэрэгжүүлэх хөрөнгө оруулалтын төслийг төлөвлөх, боловсруулахдаа мэргэжлийн байгууллагын санал, дүгнэлтийг тусгах;

4.2.2. Улсын хөрөнгө оруулалтын хөтөлбөрт тусгах хөрөнгө оруулалтын төсөлтэй холбоотой тооцоо, судалгаа, шийдвэр, дүгнэлт зэргийг холбогдох байгууллагуудаас гаргуулан авах;



4.2.3. Төсвийн ерөнхийлөн захирагч нь улсын хөрөнгө оруулалтын хөтөлбөрт тусгагдсан хөрөнгө оруулалтын төслийг хэрэгжүүлэхэд удирдлага, зохион байгуулалтаар хангаж, шаардлагатай арга хэмжээг авах, гүйцэтгэгч, захиалагч байгууллагын мэдээлэл, сонсголыг улирал тутам хэлэлцэх;

4.2.4. Аймаг, нийслэлийн Засаг дарга улсын хөрөнгө оруулалтын хөтөлбөрт тусгах хөрөнгө оруулалтын төслийн саналаа үндэсний хөгжлийн асуудал эрхэлсэн төрийн захиргааны байгууллагаас баталсан аргачлалын дагуу боловсруулж, аймаг, нийслэлийн иргэдийн Төлөөлөгчдийн Хурлын Тэргүүлэгчдээр хэлэлцүүлэн холбогдох төрийн захиргааны төв байгууллагад хүргүүлэх.

Тав. Бусад

5.1. Улсын хөрөнгө оруулалтын хөтөлбөрөөр батлагдсан хөрөнгө оруулалтын төсөлд тухайн жилд хуваарилсан хөрөнгийг зориулалтын дагуу үр ашигтай зарцуулж, гүйцэтгэл гаргах, тайлагнах, мэдээлэх үүргийг төсвийн ерөнхийлөн захирагч хариуцна.

5.2. Улсын хөрөнгө оруулалтын хөтөлбөрийг төлөвлөх, хэрэгжүүлэх, тайлагнах журмыг зөрчсөн төсвийн байгууллагын ерөнхий менежер болон бусад албан тушаалтанд холбогдох хууль тогтоомжид заасны дагуу хариуцлага хүлээлгэнэ.

МОНГОЛ УЛСЫН ЗАСГИЙН ГАЗРЫН ТОГТООЛ

2018 оны 11 дүгээр
сарын 21-ний өдөр

Дугаар 353

Улаанбаатар
хот

Журам батлах тухай

Инновацийн тухай хуулийн 6.1.5, 13.14-д заасныг тус тус үндэслэн Монгол Улсын Засгийн газраас ТОГТООХ нь:

1. “Инновацийн тэргүүлэх чиглэл тодорхойлох журам”-ыг хавсралт ёсоор баталсугай.

2. Журмын хэрэгжилтийг хангаж, хяналт тавьж ажиллахыг Боловсрол, соёл, шинжлэх ухаан, спортын сайд Ц.Цогзолмаад үүрэг болгосугай.

**МОНГОЛ УЛСЫН
ЕРӨНХИЙ САЙД**

У.ХҮРЭЛСҮХ

**БОЛОВСРОЛ, СОЁЛ, ШИНЖЛЭХ
УХААН, СПОРТЫН САЙД**

Ц.ЦОГЗОЛМАА

Засгийн газрын 2018 оны 353 дугаар
тогтоолын хавсралт

ИННОВАЦИЙН ТЭРГҮҮЛЭХ ЧИГЛЭЛ ТОДОРХОЙЛОХ ЖУРАМ

Нэг. Нийтлэг үндэслэл

1.1. Энэ журмаар инновацийн тэргүүлэх чиглэлийг тодорхойлох, түүнтэй холбогдон үүсэх харилцааг зохицуулна.

1.2. Инновацийн тэргүүлэх чиглэлийг тодорхойлоход Инновацийн тухай хууль тогтоомж, Хөгжлийн бодлого төлөвлөлтийн тухай хууль, Хөгжлийн бодлогын баримт бичиг боловсруулах нийтлэг журам болон энэ журмыг мөрдөнө.

1.3. Инновацийн тэргүүлэх чиглэл нь эдийн засгийн өсөлтийг эрчимжүүлэх, өндөр технологийн болон өрсөлдөх чадвартай бүтээгдэхүүн үйлдвэрлэх, экспортлох, өндөр үр ашигтай үйлчилгээний төрөл, хэлбэрийг бий болгох, үндэсний инновацийн чадавх, нөөцийг оновчтой ашиглах, инновацийн талаарх төрийн дэмжлэгийн үр өгөөжийг нэмэгдүүлэхэд чиглэгдэнэ.

1.4. Инновацийн тэргүүлэх чиглэл (цаашид “Тэргүүлэх чиглэл” гэх)-д хамааралтай хөтөлбөр, төслийг тэргүүн ээлжинд сонгон хэрэгжүүлнэ.

Хоёр. Тэргүүлэх чиглэл тодорхойлох шаардлага,
шалгуур үзүүлэлт

2.1. Тэргүүлэх чиглэлийг Хөгжлийн бодлого төлөвлөлтийн тухай хуулийн 6 дугаар бүлэгт заасан хүчин төгөлдөр мөрдөгдөж байгаа урт, дунд хугацааны хөгжлийн бодлогын баримт бичигт нийцүүлэн тодорхойлно.

2.2. Тэргүүлэх чиглэлийг тодорхойлохдоо дараахь шалгуур үзүүлэлтийг баримтална:

2.2.1. хүний аюулгүй байдал, эрүүл мэндийг хамгаалах, амьдралын нөхцөлийг сайжруулах, хүний хөгжилд дэмжлэг үзүүлсэн байх;

2.2.2. нийгэм, эдийн засгийн хөгжлийг түргэтгэх үр ашигтай технологийг хөгжүүлэхэд чиглэгдсэн байх;

2.2.3. дотоод, гадаадын зах зээлд нэвтрүүлэх бүтээгдэхүүн, үйлчилгээ чанартай, өрсөлдөх чадвартай байх;

2.2.4. импортыг орлох, экспортын нөөцийг өсгөхөд чиглэгдсэн байх;



2.2.5. байгаль орчныг хамгаалах, орчны бохирдол, доройтлыг бууруулж, экосистемийн тэнцвэрт байдлыг хангах зорилгод нийцсэн байх;

2.2.6. дотоодын түүхий эд ашиглан нэмүү өртөг шингэсэн бүтээгдэхүүн, зах зээлийн шинэ эрэлт, аж үйлдвэрийг бий болгосон байх;

2.2.7. санхүүгийн болон бусад нөөцийг үр ашигтай зарцуулах, бүтээгдэхүүн, үйлчилгээний зах зээлд нэвтрэх боломж, маркетинг, зохион байгуулалтын үр өгөөжийг бий болгосон байх.

Гурав. Тэргүүлэх чиглэлийг тодорхойлох үйл ажиллагаа

3.1. Өндөр технологи, үндэсний инновацийг хөгжүүлэх асуудал хариуцсан Засгийн газрын гишүүний шийдвэрээр тэргүүлэх чиглэл тодорхойлох Ажлын хэсгийг байгуулна.

3.2. Ажлын хэсгийн бүрэлдэхүүнд өндөр технологи, үндэсний инновацийг хөгжүүлэх асуудал эрхэлсэн төрийн захиргааны төв байгууллага, холбогдох яам, агентлаг, нутгийн захиргааны байгууллага, эрдэм шинжилгээний байгууллага, мэргэжлийн холбоо, төрийн бус байгууллага, аж үйлдвэр, хувийн хэвшлийн төлөөллийг оруулна.

3.3. Ажлын хэсэг дараахь чиг үүргийг хэрэгжүүлнэ:

3.3.1. тэргүүлэх чиглэл тодорхойлох ажлын төлөвлөгөө гаргах;

3.3.2. шаардагдах мэдээлэл цуглуулах, мэдээллийг нэгтгэн боловсруулж, дүн шинжилгээ хийх;

3.3.3. тэргүүлэх чиглэлийг тодорхойлоход шаардагдах инновацийн бүтээгдэхүүн, үйлчилгээ, технологи, тэдгээрийн үндсэн шинж чанарын тодорхойлолтыг бэлтгэх;

3.3.4. тэргүүлэх чиглэлийн томъёолол, хэрэгжүүлэх санал, хүрэх үр дүнгийн төсөөллийг боловсруулах;

3.3.5. тэргүүлэх чиглэлийн төслийг боловсруулах.

3.4. Өндөр технологи, үндэсний инновацийг хөгжүүлэх асуудал эрхэлсэн төрийн захиргааны төв байгууллага Ажлын хэсгийн боловсруулсан тэргүүлэх чиглэлийн төслийг Шинжлэх ухаан, технологийн үндэсний зөвлөлөөр хэлэлцүүлнэ.

3.5. Өндөр технологи, үндэсний инновацийг хөгжүүлэх асуудал эрхэлсэн төрийн захиргааны төв байгууллага тэргүүлэх чиглэлийн төслийг Засгийн газрын хуралдаанаар хэлэлцүүлж батлуулна.

Дөрөв. Хэрэгжүүлэх арга хэмжээ

4.1. Тэргүүлэх чиглэлийг хэрэгжүүлэх ажлыг өндөр технологи, үндэсний инновацийг хөгжүүлэх асуудал эрхэлсэн төрийн захиргааны төв байгууллага, холбогдох яам, агентлаг, аймаг, нийслэлийн Засаг дарга хамтран хөтөлбөр, төлөвлөгөө боловсруулж хэрэгжүүлнэ.

4.2. Инновацийн тухай хуульд заасан хугацаанд тэргүүлэх чиглэлийг тодотгож байна.

МОНГОЛ УЛСЫН ЗАСГИЙН ГАЗРЫН ТОГТООЛ

2018 оны 11 дүгээр
сарын 21-ний өдөр

Дугаар 354

Улаанбаатар
хот

Журам шинэчлэн батлах тухай

Соёлын өвийг хамгаалах тухай хуулийн 40.5-д заасныг үндэслэн Монгол Улсын Засгийн газраас ТОГТООХ нь:

1. “Соёлын биет бус өвийг үндэсний болон дэлхийн хэмжээнд сурталчлан алдаршуулах, түгээн дэлгэрүүлэхэд онцгой хувь нэмэр оруулсан өвлөн уламжлагчид мөнгөн шагнал олгох журам”-ыг хавсралт ёсоор шинэчлэн баталсугай.

2. Журмын хэрэгжилтэд хяналт тавьж ажиллахыг Боловсрол, соёл, шинжлэх ухаан, спортын сайд Ц.Цогзолмаад үүрэг болгосугай.

3. Энэ тогтоол гарсантай холбогдуулан “Журам батлах тухай” Засгийн газрын 2016 оны 3 дугаар сарын 7-ны өдрийн 145 дугаар тогтоолыг хүчингүй болсонд тооцсугай.

**МОНГОЛ УЛСЫН
ЕРӨНХИЙ САЙД**

У.ХҮРЭЛСҮХ

**БОЛОВСРОЛ, СОЁЛ, ШИНЖЛЭХ
УХААН, СПОРТЫН САЙД**

Ц.ЦОГЗОЛМАА



Засгийн газрын 2018 оны 354 дүгээр
тогтоолын хавсралт

СОЁЛЫН БИЕТ БУС ӨВИЙГ СУРТАЛЧЛАН АЛДАРШУУЛАХ,
ТҮГЭЭН ДЭЛГЭРҮҮЛЭХЭД ОНЦГОЙ ХУВЬ НЭМЭР ОРУУЛСАН
ӨВЛӨН УЛАМЖЛАГЧИД МӨНГӨН ШАГНАЛ ОЛГОХ ЖУРАМ

Нэг. Нийтлэг үндэслэл

1.1. Соёлын биет бус өвийг үндэсний болон дэлхийн хэмжээнд сурталчлан алдаршуулах, түгээн дэлгэрүүлэхэд онцгой хувь нэмэр оруулсан өвлөн уламжлагчийг тодруулж, мөнгөн шагнал олгохтой холбогдсон харилцааг энэ журмаар зохицуулна.

1.2. Соёлын биет бус өвийг үндэсний болон дэлхийн хэмжээнд сурталчлан алдаршуулах, түгээн дэлгэрүүлэхэд онцгой хувь нэмэр оруулсан нэг өвлөн уламжлагчийг жил бүр тодруулж, мөнгөн шагнал (цаашид “шагнал” гэх) олгоно.

1.3. Энэхүү журам нь гадаадын иргэн, харьяалалгүй хүнд хамаарахгүй.

1.4. Шагналыг хоёр жил дараалан нэг өвлөн уламжлагчид олгохгүй.

Хоёр. Шагналд нэр дэвшүүлэх, хянан шийдвэрлэх

2.1. Өвлөн уламжлагчийг дараахь шалгуур үндэслэлээр шагналд нэр дэвшүүлнэ:

2.1.1. үндэсний болон олон улсын хэмжээнд зохион байгуулагдсан уралдаан, тэмцээнд амжилт гаргасан;

2.1.2. соёлын биет бус өвийг сурталчлах, түгээн дэлгэрүүлэх чиглэлээр дотоод, гадаадад зохион байгуулагдсан арга хэмжээнд идэвхтэй оролцсон;

2.1.3. өөрийн санаачилгаар соёлын биет бус өвийг сурталчлах, түгээн дэлгэрүүлэх чиглэлээр дотоод, гадаадад арга хэмжээ зохион байгуулсан;

2.1.4. соёлын биет бус өвийг хамгаалах, хөгжүүлэх үйл хэрэгт идэвх, санаачлагатай оролцсон.

2.2. Аймаг, нийслэлийн Засаг дарга өвлөн уламжлагчийг шагналд нэр дэвшүүлэх саналыг жил бүрийн 12 дугаар сарын 25-наас өмнө Соёлын

өвийн үндэсний төвд хүргүүлнэ. Саналд дор дурдсан баримт бичгийг хавсаргана:

2.2.1. шагналд нэр дэвшүүлсэн үндэслэл бүхий албан бичиг;

2.2.2. өвлөн уламжлагчийн иргэний үнэмлэхний хуулбар;

2.2.3. албан байгууллагын тодорхойлолт эсхүл харьяалах баг, хорооны Засаг даргын тодорхойлолт;

2.2.4. соёлын биет бус өвийг үндэсний болон дэлхийн хэмжээнд сурталчлан алдаршуулах, түгээн дэлгэрүүлэх чиглэлээр хийж гүйцэтгэсэн ажлыг гэрчлэх баримт бичиг, гэрэл зураг, дүрс бичлэг, бусад зүйл.

2.3. Аймаг, нийслэлийн Засаг дарга нас барсан өвлөн уламжлагчийн нэрийг энэ журамд нийцүүлэн шагналд нэр дэвшүүлж болно.

2.4. Соёлын өвийн үндэсний төв энэ журмын 2.2-т заасан баримт бичгийн бүрдлийг хянаж хүлээн авна. Бүрдэл дутуу баримт бичгийг хүлээж авахгүй.

2.5. Соёлын өвийн үндэсний төв шаардлагатай бол холбогдох байгууллагаас нэмэлт мэдээлэл авч болно.

2.6. Соёлын өвийн үндэсний төв шагналд нэр дэвшүүлсэн өвлөн уламжлагч тус бүрийн талаар дор дурдсан байгууллагаас санал авах ажлыг зохион байгуулна:

2.6.1. Соёл, урлагийн асуудал хариуцсан төрийн захиргааны байгууллага;

2.6.2. Шинжлэх ухааны академи;

2.6.3. ЮНЕСКО-ийн Монголын үндэсний комисс;

2.6.4. Соёл, урлагийн их сургуулийн Эрдмийн зөвлөл;

2.6.5. соёл, урлагийн чиглэлээр үйл ажиллагаа явуулдаг 3-аас доошгүй төрийн бус байгууллага.

2.7. Соёлын өвийн үндэсний төв энэ журмын 2.2, 2.6-д заасан баримт бичгийг бүрдүүлэн соёлын асуудал хариуцсан төрийн захиргааны төв байгууллагын дэргэдэх Соёлын биет бус өвийн мэргэжлийн зөвлөл (цаашид “Мэргэжлийн зөвлөл” гэх)-д хүргүүлнэ.

2.8. Мэргэжлийн зөвлөл шагналд нэр дэвшүүлсэн өвлөн уламжлагч тус бүрийн талаар нэг бүрчлэн хэлэлцэж, нэг өвлөн уламжлагчийг нууц санал хураалтаар тодруулан санал, дүгнэлтийн хамт соёлын асуудал хариуцсан Засгийн газрын гишүүнд уламжилна.



2.9. Мэргэжлийн зөвлөл шагналд нэр дэвшигчийг тодруулахдаа өвлөн уламжлагчийн нэр дэвшсэн шалгуур үндэслэлийн хүрээнд гүйцэтгэсэн ажлын үр дүн, тоо хэмжээ, чанарын үзүүлэлтээс гадна түүний ур чадвар болон бэлтгэсэн шавь, соёлын биет бус өвийн чиглэлээр хэвлүүлсэн судалгаа, сурталчилгааны ном, бүтээл зэргийг харгалзана.

2.10. Соёлын асуудал хариуцсан Засгийн газрын гишүүн Мэргэжлийн зөвлөлийн санал, дүгнэлтийг үндэслэн өвлөн уламжлагчид шагнал олгох шийдвэрийг гаргаж, олон нийтэд зарлана.

Гурав. Шагнал гардуулах

3.1. Шагнал гардуулах ёслолын арга хэмжээг соёлын асуудал хариуцсан төрийн захиргааны төв байгууллага зохион байгуулна.

3.2. Шагналыг билгийн тооллын өвлийн сүүл сарын шинийн 25-ны өдөр Монгол Улсын Ерөнхий сайд гардуулна.

3.3. Шалгарсан өвлөн уламжлагчид Хүндэт өргөмжлөл, гучин сая төгрөгийн мөнгөн шагнал олгоно.

3.4. Өвлөн уламжлагч шагнал гардуулах ёслолын арга хэмжээнд биеэр ирэх боломжгүй бол Монгол Улсын Ерөнхий сайдын бие төлөөлөгч оршин суугаа газарт нь очиж гардуулж өгнө.

3.5. Өвлөн уламжлагч нас барсан бол шагналыг түүний гэр бүлийн гишүүнд гардуулж өгнө.

3.6. Шагнал олгосон өвлөн уламжлагчийг хэвлэл, мэдээллийн хэрэгслээр олон нийтэд сурталчлах ажлыг соёл, урлагийн асуудал хариуцсан төрийн захиргааны төв байгууллага зохион байгуулна.

Дөрөв. Бусад зүйл

4.1. Шагнал олгоход шаардагдах зардлыг Соёл, урлагийг дэмжих сангийн хөрөнгөнөөс санхүүжүүлнэ.

Хаяг:

“Төрийн мэдээлэл” эмхэтгэлийн редакц,
Улаанбаатар-14201, Төрийн ордон 124 тоот
И-мэйл: turiin_medeel@parliament.mn

Утас: 262420

Хэвлэлийн хуудас: 1.25

Индекс: 200003